



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA

Komunikasu Imprensa
Munisípiu Kobalima
24 Outubru 2023

JSMP akompaña treinadór sira Suku Beiseuc iha fasilita treinamentu kona-ba igualdade jéneru, tráfico umanu no violénsia bazeia ba jéneru ba membru comunidade sira seluk

Iha 11 no 12 Outubru 2023, JSMP akompaña treinadór na'in tolu hosi Suku Beiseuc ne'ebé antes ne'e JSMP prepara ona liuhosi treinamentu ba treinadór ka *training of trainers (ToT)*, hodi habelar tutan tan informasaun ba membru comunidade sira seluk Suku Beiseuc nian.

Treinamentu ida ne'e nu'udar parte ida husi programa tinan rua (2) ho título "Prevensaun no Resposta ba Tráfiku Umanu ho Baze iha Komunitade, Responsivu ba Jéneru no Sentradu ba Sobrevivente (2023-2024)" ne'ebé finansia husi Governu Timor-Leste liuhusi Ministériu Interiór no implementa husi UN Women Timor-Leste ho parseria ho JSMP. Ho programa ida ne'e, JSMP halo ona treinamentu ba membru comunidade iha Suku Beiseuc hamutuk ualu nulu resin ona.

Matéria sira mak kona-ba igualdade jéneru, violénsia bazeia ba jéneru (VBJ), tráfico umanu, prevensaun no responde ba kazu VBJ no trafiku umanu no rede referál. Treinamentu ne'e hala'o iha sede suku Beiseuc, Postu Administrativu Tilomar, Munisípiu Covalima.

Objetivu hosi treinamentu ne'e mak atu habelar tutan informasaun ba membru comunidade suku sira seluk la tuir treinamentu sira antes, hodi bele hasa'e sira nian koñesimentu kona-ba matéria relevante sira. Nune'e, membru comunidade sira bele kontribui ho di'ak liu no efetivu iha prevene no kombate VBJ no tráfico umanu iha sira nia suku laran.

"JSMP hanoin katak informasaun importante sira ne'e tenke kontinua trasmite ba comunidade sira seluk ne'ebé seidak hetan oportunidade hanesan, atu nune'e bele ajuda hasa'e comunidade sira ninia koñesimentu atu prevene sira nia aan hosi krime no apoia vítima sira iha comunidade karik sai vítima ba krime," dehan Diretora Ezekutiva JSMP, Sra. Ana Paula Marçal.

Diretora mós hatutan katak JSMP apresia aas tebes kolaborasaun xefe suku Beiseuc no mobilizadór ne'ebé organiza ona treinamentu ne'e ho di'ak no mós ba fasilitadór na'in tolu hosi suku Beiseuc ne'ebé konsege fasilita treinamentu ne'e ho di'ak tebes.

Enkuantu, Xefe Suku Beiseuc iha nia intervensaun agradese tebes ba JSMP tanba bele prepara ona partisipante sira balun no fó ona konfiansa ba sira sai treinadór ba matéria kona-ba igualdade jéneru, VBJ no krime tráfico umanu.

Iha sesaun apresentasaun matéria, partisipante sira ativu teb-tebes hodi hato'o sira-nia preokupasaun sira no fahe sira-nia esperiênsia kona-ba violênsia sira iha sesaun kona-ba igualdade jéneru no violênsia bazeia ba jéneru. Partisipante ida fahe nia esperiênsia kona-ba kazu poder paternál no alimentasaun ne'ebé nia hasoru katak mane ida fo isinrua ba nia no abandona nia hafoin nia isinrua. Bainhira nia oan moris, mane ne'e la tau-matan, nune'e família lori kazu ne'e ba tribunál no hetan desizaun katak kada fulan mane ne'e tenke fó osan dollár amerikanu haat nulu (US\$40.00) ba nia oan maibé la fó to'o agora no nia ho família nonook de'it tanba la hatene oinsa atu hato'o problema ne'e. Maibé hafoin tuir formasaun ne'e, nia hatene ona katak kuandu nia eis-la'en ne'e la halo tuir nia obrigasaun ba alimentasaun ne'e, nia bele ba fali keixa atu nia eis-la'en bele hatan ba krime ida ho naran la halotuir obrigasaun alimentár.

Iha sesaun tráfico umanu, partisipante ida fahe nia esperiênsia katak uluk bainhira nia sei eskola iha Dili, nia bin no alin sira ema ba bosok dehan atu fasilita sira ba serbisu iha rai-li'ur ho saláriu boot maibé tenke hatama uluk osan dollár amerikanu lima nulu (US\$50.00) no kartaun eleitorál, nune'e nia bin no alin sira mós halo tuir saida mak ema ne'e husu, maibé ikus mai, sira la ba rai li'ur to'o agora no sira nia osan ne'ebé fó ba ema ne'e lakon de'it no ema ne'e sira buka la hetan nune'e sira la apresenta keixa. Maibé hafoin tuir formasaun ne'e, nia aprende ona katak hahalok ne'ebé ema ne'e halo ba nia bin ho alin sira ne'e iha ona indísiu ba krime tráfico umanu no karik iha futuro kazu hanesan akontese tan, nia sei informa ba autoridade lokál no ba apresenta keixa iha polísia.

Alende apresentasaun matéria sira refere, JSMP mós haklean koñesimentu partisipante sira ba iha trafiku umanu liuhosi loke video badak kona-ba lala'ok tráfico umanu ne'ebé babain prátika hosi trafikante sira relasiona ho mekanizmu rekrutamentu ne'ebé iha tendênsia bosok, ameasa, uza forsa, no aproveita ema nia vulnerabilidade hodi fó benesífiu ba ema, grupu ka kompañia ne'ebé halo rekrutamentu.

Iha parte ikus, molok taka treinamentu ne'e, xefe suku hato'o katak comunidade sira ne'e sei continua transmite informasaun importante sira ne'e ba comunidade sira seluk atu nune'e sira mós bele hatene no konsidera membru família sira no fahe

serbisu uma laran ho justu hodi la hamosu diskriminasaun ka violénsia iha família no halo prevensaun ba krime sira.

Xefe suku mós rekomenda ba JSMP atu kontinua habelar informasaun importante sira ne'e ba comunidade sira seluk no mós oinsa JSMP bele enkaixa mós matéria kona-ba droga iha treinamentu sira tuir mai ho razaun tanba comunidade sira ne'ebé hela besik fronteira la'ós sai vítima de'it ba kazu tráfico umanu maibé sira mós sempre asesu ba droga sira hosi nasaun viziñu.

Partisipante sira ne'ebé partisipa iha treinamentu ne'e hamutuk ema nain 30, kompostu hosi feto 19 no mane 11.

Atu hetan informasaun liután favór kontaktu

Sra. Ana Paula Marçal

Diretora Ezekutiva JSMP

Diresaun e-mail: ana@jsmp.tl

Website: <http://jsmp.tl>